

QUÆSTIO MEDICA

QUOD LIBETARIIS DISPUTATIONIBUS

MANE DISCUTIENDA

IN SCHOLIS MEDICORUM,

Die Jovis 5. Februarij.

M. JACOBO THEVART

DOCTORE MEDICO, PRÆSIDE.

An Panis spumæ cervisæ fermentatus minùs salubris?

I.

INTER cibos qui corporis nostri substantiæ assimilantur, nullus est pane præstantior, nullus salubrior; A pueris, juvenibus, senibus, omni tempore cum omnibus eduliis & obsoniis expeditur & editur; ac ut cibi absque sale insipidi, ita nullum suave edulium sine panis adjumento: tanta est illius suavitas & bonitas, ut omnia penè animalia fastiditis carnibus ad panem ferantur avidissimè; morbos incursum aut in ipsis constituti, quando nulla ciborum blandimenta movent, nulla que invitat orexis, panem nihilominus appetunt & degustant: qui se recolligunt à valetudine, primam voluptatem ciborum in panis gustatu experiuntur: Ventriculo is acceptissimus, ab eo bellè conficitur, velut à jecore in succum vertitur optimum temperatum & minimè excrementitium: nullo itaque alimento magis continetur vita quàm pane optimo: salubrius vivunt, qui eo solo vescuntur, infœlicius qui varietate ciborum & obsoniorum eruditò apparatus delectantur: placent nonnulla cibaria dulcedine acore, alia fœdine odore; solus panis omnium eduliorum suavitatem in se continet, cujus satietas neminem capit; ea cum illi undique

accedat commendatio velut in ²esculenta primas tenenti, in eo conficiendo nulla non est adhibenda cura.

I I.

IN parando pane optimo plurimum refert idoneam materiam nosse. Hæc triticum est in farinam comminutum, aqua, sal & fermentum: ut lautus & elegans panis fiat è tritico farina sit flavescens, maturo, tineis & pulvere non inquinato, lolij semine repurgato, pruina non vitiatum, quæ nec imbre sit madida, nec ex asservatione fœtens: ad mixtionis rationem, aqua fontana seligatur, aut fluvialis è medio hausta alveo, non putealis, non lacustris, egelida potius quam frigida: sal marinus assumatur, non fossilis, nec de muria conditarum carnum eductus, nec de piscium lorione extractus, nec de nitri lixivio factitius: fermentum vulgare multis retro sæculis usurpatum adhibeatur, quod farina est ad formam pulvis redacta & cooperta donec acescat, cujus portione iustâ diligenti manuum versatione & subactione elaborata massa fermentescens, crescit in molem, & attenuatis partibus aëreæ qualitatibus utiliter multum concipit; sic panis qui tum salis, tum fermenti laudabilis quod satis est habet, qui bene subactus, bene coctus, tener, niveus, mollique filigine factus, qualis Gonesianus, omnium ut lautissimus, ita & saluberrimus, qui facile concoquitur, facilius distribuitur & sanguinem laudabilem gignit. Apage eos qui pro condimento pani adjiciunt ova, lac, crocum, mel, saccharum, butyrum, caseum; non panis ex iis, sed placenta fiunt, rhyemata, lachana, aliæque crassioris succi cupedia quæ jecoris meatus obstruunt, lienis imbecillitatem augent calculosque in renibus cogunt.

I I I.

FERMENTI vis omnis acori debetur, cave tamen laudabile fermentum ab aceto, vel omphacio expectes utilemque fermentationem; vulgare apud omnes gentes receptum innocens sed illud non ætate evanidum, non magis quam par sit acescens & biduo triduoque ad summum antequam panificio statuta dies accedat ad usum repositum: recentioris ætatis popina potius quam schola medica cervisiæ spumam in illius locum suffecit cujus ope pasta fermentescens citius quidem in maximam molem tumet sed cum sanitatis dispendio, cujus vi panis sit rarior & levior, sed non salubrior: Nempe excrementitia est substantia liquoris in modum sese à cervisia separans, dum innato calore effervesceat ac fermentatur, quæ una cum sordibus pellitur foras secernitur & ad usum asserva-

tur: spuma illa calida & sicca est acris, flatulenta, aspectu foeda, ingrata gustu, odore teterrima; quæ æstate dum calet momento corrumpitur & vitiorum quibus cervisia scatet pravam qualitatem redolet. Quippe non minus damnum à cervisiæ spuma quam ab ipsa expectandum, quæ vel si paraturam spectes morborum variorum origo reputanda: hordeum vel triticum putrescens, mox torrefactum, insalubris potus vulgata materies est, una cum lupulô cui aqua aliquando limosa velut convenientior affunditur. Alij maltum in ejus lixivio aquæ vice maceratum decoquendum putant ut compositam simulque gratam, sic loquuntur, potionem conficiant; alij pro lupulo lupulivæ floribus, camini fuliginem sufficiunt, aut aqua falsa maltum macerant quo acrius linguam radat & sitiantur magis cervisiæ, quo plus sunt potæ; Et erit qui hujus ingrata & vitiosa potionis sordes salubres esse ac utiles pani conficiendo judicabit?

I V.

PANIS ex cervisiæ fermento confectus initio quidem levior & suavior verum citissime alteratur & rescitur; ejus dum *ῥῆσις & ὑμωσις* sit in ventriculo, sanguis fervidior generatur, seri acris & mordacis magna colluvies colligitur, succus omnis in corpore labefactatur, illaque ipsa tunc sunt expectanda quæ à cervisiæ potu sequuntur incommoda. Quippe sanguis noxiâ qualitate imbutus partibus principibus *δυσσποριον* labem latenter inurit, quam citius incurrunt nobiles & delicati, qui noxas quasque difficilius ferunt: diceres idem prorsus illis contingere ac quod frigidiores nivatoque potu utentibus observavit Galenus: scilicet primo quoque occurssu quamvis cervisia ejusque spuma nullum corporibus sensibile vitium inferat, sensim tamen & occultè assiduo usu crescente malo, articulos laxat, nervos tentat, & viscera morbis afficit, magnis, difficilibus, *ἀνέτοις*; hinc non fato sed ante diem multi corruptis omnino visceribus intereunt; hinc serum efferum in morbis jam utramque paginam facit; & vinum quod maxime palato arridet, jecoris & pulmonis substantiam labefactat, & sui amantissimis clam tandem jugulum petit; Sic natura tamquam fcenerator has voluptatum usuras reposcit ultra modum fasque concupitarum. Certè hujus fermenti noxa, vel ex eo patet quod lac infantibus & senibus conveniens alimentum, tabidis, dysentericis, arthriticis utile medicamentum, veneno infectis potentissimum alexipharmacum, propter sic fermentatum panem statim acescat & corrumpatur in ventriculo eorum qui solo pane & lacte utuntur.

FRUSTR A sunt qui panis cervisiæ spumâ fermentati tenuitatem laudant & suavitatem, si desit bonitas & salubritas à medico præcipuè expetenda : fungos helvellas & boletos ita condiunt coqui, & in honorem adducunt, ut nihil possit esse suavius, quæ non minus voluptuaria venena censentur; nihil fructibus jucundius, ex quibus tamen gratiores se in bilem vertunt, cholera, dysenteria & sæpe febrium putridarum causam. Si fermenti illius apud antiquos supersunt vestigia, supersunt & glandium esus, quas inventis frugibus, nemo degustare velit : neque putes liquorem hunc sive spumam excrementitiam ex qua panis fermentatur purior rem esse cervisiæ partem, spiritum ejusve substantiam, cremori lacti similem, sinceriori & tenuiori substantiæ vini analogam quæ in vini doliis supereminet; merum est cervisiæ excrementum, acre, mordax, amarum, pani vim noxiam inducens, quem amarum, siccum, ingratum & insalubrem reddit: vinum post aquam potulentorum optimum & cordi amicum, dum fervet in doliis, mel & saccharum dum condiuntur fructus, carnes dum coquantur spumam crassam, sordidam & feculentam ebulliunt & eructant, quam nemo velut spiritibus vivificis turgentem ad cibarios usus traducere tentaverit; multominus cervisiæ spumam, quæ plerumque concreta, arida, sicca, acris & erodens è longinquis regionibus affertur.

Ergo Panis spumâ cervisiæ fermentatus minus salubris?

DOMINI DOCTORES DISPUTATURI.

M. Guillelmus Petit.

M. Henricus Mahieu Chirurgia Professor.

M. Claudius Guerin.

M. Paulus Mattor.

M. Carolus le Long.

M. Ludovicus Morin.

M. Ioannes de Bourges.

M. Michaël de la Vigne.

M. Petrus Perreau, Pharmacologia Professor.

Proponebat Lutetiæ FRANCISCUS BAZIN,
Constantienfis, A. R. S. H. MDCLXXI.

P A R I S I I S,

Ex Typographia FRANCISCI MUGUET, Regis Typographi,
viâ Citharæ.